

瓊山縣志卷十四

金石

金石之學漢魏以前之碑刻可以證經唐宋以後之碑刻可以證史以其援引經文各存異義詳敘事實出自當時不同後世傳聞遺說金石之學所以可貴也瓊州僻處海南漢魏無碑刻自唐宋始有之今存無多而盛於明清二代舊志著錄寥寥無多沿譌挂漏不可殫述今爲旁搜博采凡碑存刻者親搨遺文可校正職官列傳之誤其碑已佚而文見別集者必詳加編輯不使闕遺俾嗜古者有所考鏡焉志金石

東潭石巖字

瓊山縣志

卷十四

金石

一

粵東金石畧云瓊山縣東潭都石巖下有平石深及丈左刻云貞元二年□□□八月丁卯僧□□□鑿爲記□□□光法名無我以下不可辨石刻熙寧甲寅秋九月中休俞城率王憲自梁敘同遊男□□書案貞元二年下缺四字疑是歲在丙寅熙寧甲寅爲宋神宗七年其餘缺字無從攷證

望闕亭石刻

獨上江亭望帝京鳥飛猶用半年程江山只恐人歸去百匝千迴繞郡城

案亭在張吳都顏村唐崖州故址李德裕貶時所建並刻詩於石其亭久廢詩石不存近同治年間邨人耕於

野得石碑摩洗而出乃是望闕亭石刻其詩句猶可辨識未知是原刻抑後人摹刻存疑

又案郡志云唐時崖州城在郡城東二十里據李太尉詩百匝千迴繞郡城之句可見亭與郡城不遠今通志改入崖州蓋不知唐之崖州即瓊山之東境也

又案太尉本傳云大中元年秋貶潮州司馬二年自洛陽水路經江淮赴潮州其年冬至潮陽又貶崖州司戶至三年正月方達珠崖郡十二月卒後見夢合狐綯綯白於帝得以喪還是二年冬貶崖州堦然可據通鑑同宣宗本紀以爲三年九月貶者誤矣

馮公墓碑

瓊山縣志

卷十四

金石

二

黃通志云在瓊山縣宣德間村人耕陶公山下掘地見石碣刻云大唐賜紫金魚袋馮公之墓翰林學士李吉甫撰文

案時以爲馮寶墓攷寶妻爲譙國夫人其卒在陳永定三年史未詳其葬處夫人卒於隋元壽初墓在電白縣則寶墓亦宜在電白府志云馮盎擒智臣等悉有番禺蒼梧珠崖之地武德初歸唐立儋崖振三州以盎爲高州總管蓋盎爲譙國夫人孫有功珠崖在武德時爲總管寶爲盎祖其年代較遠李吉甫憲宗嗣位時召爲翰林學士詳舊唐書本傳距盎在武德時已有二百年上距永定三年已三百六十餘年吉甫斷不能爲寶撰墓碑可知

也豈馮氏子孫世襲總管至吉甫時尚有其人耶況吉甫世居趙郡與瓊州相去數千里安能往返請爲墓銘其事恐屬傳聞之誤又不得吉甫集一攷之存疑可也

新唐書經籍志李吉甫集二十卷

乾亨寺鐘銘 佚

輿地紀勝云瓊州乾亨寺鐘在開元寺有南漢乾和九年鐘銘 阮通志同

案曹學佺廣東名勝志云開元寺卽古乾亨寺在南橋內攷南橋在今府城南門外寺廢已久遺址莫存伏波將軍廟碑記

漢有兩伏波皆有功德於嶺南之民前伏波邳離路侯

瓊山縣志

卷十四

金石

三

也後伏波新息馬侯也南越自三代不能有秦雖遠通置吏旋復爲夷邳離始伐滅其國開九郡然至東漢二女子側貳叛嶺南震動六十餘城時世祖初平天下民勞厭兵方閉玉關謝西域况南荒何足以辱王師非新息苦戰則九郡左衽至今矣由此論之兩伏波廟食於嶺南均矣古今所傳莫能定於一自徐聞渡海適珠崖南望連山若有若無杳一髮耳艤舟將濟股慄魄喪海上有伏波祠元豐中詔封忠顯王凡濟者必卜焉某日可濟乎必吉然後敢濟使人信之如度量權衡必不吾欺者嗚呼非盛德孰能如此自漢以來珠崖儋萬或置或否揚雄有言珠崖之棄捐之力也否則介鱗易我衣

裳此言於當時可也自漢末至五代中原避亂之人多  
家於此今衣冠禮樂班班然矣其可復言棄乎四州之  
地以徐聞爲咽喉南北欲濟者以伏波爲指南事神其  
可不恭某以罪謫儋耳三年今獲還海北往返皆順風  
無以答神貺乃碑而銘之曰至險莫測海與風至幽不  
仁此魚龍至信可恃漢二公寄命一葉萬仞中自北而  
南洗汝胸撫循民彝必精通自南而北端汝躬屈伸窮  
達常正忠生爲人英歿愈雄神雖無言我意同

案輿地紀勝云東坡文黃通志云廟在郡城北六里龍  
岐村宋建祀漢二伏波將軍蘇軾撰廟記與雷州同攷  
李綱威武厝碑陰云故翰林學士承旨蘇公謫儋耳旣

北歸作伏波將軍厝碑言兩伏波皆有功德於嶺表厝  
食海上爲往來濟者指南辭意瓌偉自作碑迄今三十  
年未克建立蓋闕典也綱以罪謫官萬安行次海濱疾  
作不果謁祠下遣子某攝祭病卧館中默禱於神異時  
倘得生還往返無虞當書蘇公所作之碑刻石廟中使  
人有所觀以答神貺時建炎三年十一月二十有四也  
旣得吉夜半乘潮而渡翼日次瓊筦恬無驚憂後三日  
祇奉德音蒙恩聽還疾良愈躬禱行宮卜以十二月五  
日己丑北渡不吉再卜十六日庚寅吉果己丑晝風霾  
大作庚寅乃息日中潮來風便波平舉帆行安如枕席  
海色天容軒豁呈露不一時已達岸乃知神之威靈肸

嚮昭著若此蘇公之言信不誣也次雷陽書碑施金委郡守董侯總其事大書深刻垂之無窮且敘所以蒙神之優者志碑陰式告觀者正廟新息馬侯也宣和中詔封佑順王別廟邳離路侯也宣和中詔封忠烈王皆在蘇公作碑之後故併記於此據此則蘇公作記在海上而非在瓊筦其時尚未立碑李忠定謫瓊北返時方大書刻石亦在海上之廟而非在瓊之廟輿地紀勝與黃通志蓋因海上有碑而誤以爲瓊筦亦有碑也至雍正十一年李鎮軍順始補刻碑在伏波祠

惠通泉碑記

禹貢濟水入於河溢爲滎河南 曰滎陽河北曰滎澤

瓊山縣志

卷十四

金石

五

沱潛本梁州二水亦見於荊州水行地中出沒數千里外雖河海不能絕也唐相李文饒好飲惠山泉置驛以取水有僧言長安昊天觀井與惠山泉通雜以他水十餘缶試之僧獨取其一曰此惠山泉也文饒爲罷水驛瓊州之東五十餘有三山菴菴下有泉味類惠山泉東坡居士過瓊菴僧惟德以水餉焉且求爲之名名曰惠通元符三年六月十七日記

案三山菴在縣東五十里符離都惠通泉側輿地紀勝云昔東坡經此僧惟德以水餉焉味類惠山因名則此泉得蘇公作記名傳其當時刻石與否不得而知今菴廢已久無從訪求存之待攷

東坡臺石柱詩 佚

案臺在開元寺東蘇公寓此鑿一泉於臺旁題詩石柱云水向石邊流出冷風從花裏過來香之句今臺廢石柱不存

浮粟泉字 佚

粵東金石畧云泉在瓊州府城東北隅二里許府志卽指爲蘇文忠雙泉之一舊爲泂酌亭今爲蘇祠祠有石刻公像泉上一石勒浮粟泉三字云公書今佚 清郡守葉汝蘭補刻嵌於泉上壁間

東坡雙泉碑 佚

案黃士俊金粟泉記云郡守陸公建泂酌亭於上石刻

瓊山縣志

卷十四

金石

六

東坡雙泉四字

東坡居士二詞碑 高三尺一寸濶二尺有奇分六一行十一字

清夜無塵月色如銀酒斟時須滿十分浮名浮利休苦勞神似隙中駒石中火夢中身雖把文章開口誰親且陶陶樂取天真幾時歸去作箇閑人背一張琴一壺酒一溪雲 九十春都過了貪忙何處追游三分春色一分愁雨翻榆莢陣風轉柳花毬閨苑先生須自責蟠桃動是千秋不知人世苦厭求東皇不拘束肯爲使君留東坡居士書

案粵東金石畧云二詞乃黃州雪堂所鐫後一總戎摹刻於此攷碑跋云文忠公書法縱逸雄健中饒姿態世

咸珍之自宋迄今其墨蹟搜索都盡即一二摩崖石刻敲搨無虛日歲久剝蝕輒復鐫鑿真意盡失良可慨惜余備官蜀中往來玻瓈江碁頤山間有年求所謂玉鼻駢券者竟未覩一善本殊爲恨事歲戊寅陞任黃州偶過雪堂臨臬閒睹公之石刻林立率多漶漫難卒讀惟行香子臨江仙二詞字畫完整未失古意瞻誦間不勝陳倉酒樓之慨亟命工榻而什襲焉且圖所以久之顧未得其道也已卯春余奉命來鎮瓊南講武之暇詢知公所謂雙泉者距城二里許有公五十四歲像存焉因趨謁之問公所刻泐酌詩則已不知所之矣余乃恍然曰噫是將成吾志也歟蓋泉以公而傳今原碑已失後

之人固不可妄續以厚誣前賢亦何妨附會以存真蹟爰出齊安所搨謀之同官僉曰善相與購貞珉選匠石摹而立於泉側是役也爲公書之故非爲泉故然數年後使雪堂諸刻相搨不休漫滅難識好奇之士安知無航海而來問茲泉者則是役也雖不爲斯泉而亦未嘗不爲斯泉於時中憲山右張君介祺書額襄舉者爲郡伯東萊戴君汝槐貳守清漳陳君文倬左營兼管中營遊擊貴竹簫應鵬右營都司吳興沈槐音而董厥成者則署瓊山縣洪州廖明府名揚也工旣竣並識於左乾隆二十四年己卯皋月上澣長至後三日瓊州總鎮山右解遜撰並書據此則摹刻二詞者總戎爲解遜翁覃

谿輯粵東金石畧時與解總戎相去未久又三按試臨  
瓊訪蘇泉古蹟書泂酌亭匾額竟未知總戎名余屢至  
雙泉謁蘇公祠前人碑刻剔苔蘚讀遺文始得總戎  
碑跋爲之一快

又案蘇公元豐二年十二月二十九日責授黃州團練  
副使五年就東坡築雪堂自號東坡居士其填祠刻石  
應在此時又考何氏紹基東洲草堂詩鈔雪堂拓蘇詞  
殘石三十卷言此石經洪匪亂後殘斷已不可聯屬則總  
戎摹刻今存蘇祠來瓊者多搨之果如總戎所言後之  
人猶宜圖所以久之也

金粟泉甄文

瓊山縣志

卷十四

金石

八

明萬厯間郡守翁汝遇禱雨於金粟菴喜泉味甘美因  
重建粟泉亭掘地得一甄上刻云洩盡先天祕□修來  
世身若思逢故友二姓草頭人旁有東坡草書跡翁珍  
之遂攜去

宣和御碑

高七尺有奇濶二尺五寸十  
六行行四十字字大徑寸

神霄玉清萬壽宮詔

御製御書

道者體之可以卽至神用之可以挈天地推之以治天  
下國家可使一世之民舉得其恬淡寂常之真而躋於  
仁壽之域朕思是道人所固有沈迷旣久待教而興俾  
欲革末世之流俗還隆古純風蓋嘗稽參道家之說獨觀  
希夷之妙立乎萬物之上統御神霄監觀萬國無疆之



休雖眇躬是荷而下民之命實明神所固迺詔天下建神霄玉清萬壽宮以嚴奉祀自京師始以致崇極以示訓化累年於茲誠忱感格高厚博臨屬者三元八節按冲科啟淨供風馬雲車來顧來饗震電交舉神光燭天羣仙翼翼浮空而來者或擲寶劍或灑玉篇駭聽奪目追參化元卿士大夫侍衛之臣悉見悉聞歎未之有咸有紀述著之簡編嗚呼朕之所以隆振道教帝君之所以眷命孚佑者自帝皇以還數千年絕道之後乃復見於今日可謂盛矣豈天之將興斯文以遺朕而吾民之幸適見正於今日耶布告天下其諭朕意毋忽仍令京師神霄玉清萬壽宮刻詔於碑以碑本賜天下如大中

神符故事摹刻立石以垂無窮

宣和元年八月十二日奉 聖旨立碑

案徽宗崇信佛道奉事惟謹攷宣和元年正月初八乙卯詔佛改號大覺金仙餘爲仙人大士之號三月詔天下知宮觀道士與監司郡縣官以客禮相見知登州宗澤坐神霄宮不敬除名編管六月詔封莊周爲微妙元通真君列禦寇爲致虛觀妙真君仍用冊命配享混元皇帝八月十二丙戌御製御筆神霄玉清萬壽宮記令京師神霄宮刻記于碑頒賜天下摹勒立石數月之中四爲道教下詔忠如宗澤坐此除名不數年卽有北狩之禍佛道何益之有哉此碑書法遒勁饒有姿致在海

南石刻中不可多得

宋兵部侍郎贈觀文殿大學士諡文義王居正諭祭碑

紹興二十一年辛未十二月既望 帝遺賜進士陳誠  
之諭祭兵部侍郎贈觀文殿大學士曰惟爾人龍著瑞  
人虎標竒繡斧揚威乘鷺車而密察金甌應卜銜鳳詔  
以宣猷聲名爭日月之光勛業煥鐘鼎之峙敬敷五典  
方膺蘭省之榮弼亮一人特重沙隄之拜觸邪佞而請  
上方之劍貞僚屬以涸下士之風兩登戎府皆遇艱危  
一斥炎荒遂成永訣特頒 御祭爰賁始終  
案續資治通鑑紹興二十年陳誠之以禮部侍郎兼侍  
講使金此碑但言賜進士疑有缺漏

瓊山縣志

卷十四

金石

十

瓊州學記

昔者聖王作民君師設官分職以長以治而其教民之  
目則曰父子有親君臣有義夫婦有別長幼有序朋友  
有信五者而已蓋民有是身則必有是五者而不能以  
一日離有是心則必有是五者之理而不可以一日離  
也是以聖王之教因其固有還以導之使不忘乎其初  
然又慮其由而不知無以久而不壞也則爲擇其民之  
秀者羣之以學校而聯之以師儒開之以詩書而成之  
以禮樂凡所以使之明是理而守之不失傳是教而施  
之無窮者蓋亦莫非因其固有而發明之而未始有所  
務於外也夫如是是以其教易明其學易成而其施之

博至於無遠之不暨而無微之不化此先王教化之澤所以爲盛而非後世所能及也淳熙九年瓊筦帥守長樂韓侯壁旣新其州之學而使以圖來請記曰吾州在中國西南萬里炎天漲海之外其民之能爲士者旣少幸而有之其記誦文詞之習又不能有以先於北方之學者故其功名事業遂無以自白於當世僕竊悲之今其堂序室則旣脩矣然尚懼其未能知所興起也是以願有謁焉吾子其有以振德之熹竊惟國家教學之意不爲不廣斯人蒙化之日不爲不深然猶有侯之所慮者豈前日之所以教者未嘗導之以其身心之所固有而徒強之以其外是以若彼其難與因爲之書其所聞

於古者以告之使瓊之士知夫所以爲學者不外於身心之所固有而用其一日之力焉則其德成行脩而無所疑於天下之理將無難者而凡所謂功名事業云者其本已在是矣若夫記誦文詞之未則本非吾事之所急而又何足爲輕重乎瓊士勉旃天生蒸民有物有則民之秉彝好是懿德是豈有古今之間遠近之殊哉侯於是邦政多可紀具刻於池亭之石固不獲書而是役之面勢程工又非侯所以屬筆之意也亦畧而不論著云是年歲在玄默攝提格冬十月庚申宣教郎直祕閣朱熹記

案粵東金石畧云學舊有朱子記并書明倫堂匾攷朱

子作記在淳熙九年壬寅其時辭免江西提□任歸適應韓侯之請故有此作其舊刻已佚 國朝□隆三十八年郡守蕭應植重書補刻碑在府學宮□□□又案記云侯於是邦政多可紀考壁本傳不考興學之功及觀知樂亭記詳叙正賦薄征教耕課吏諸善政又陳說禮義廉耻以開曉斯民表其從化者以厲其不率教者行之期年吏民和洽俗以一變黎人聞風思慕願供田租是爲教化之實政據此可補本傳之缺

瓊州通守劉公勅小學記

篆額高四尺有奇濶二尺三分二十八行每行三十七字

古者以教學爲先有大學有小學王畿置小學辟雍之側其在侯服邦國則列之類宮之右六年教以方名十

瓊山縣志

卷十四

金石

十二

年學書計十有三年學樂誦詩舞勺十有五年舞象學射御學成有秀異者移諸庠序自庠序移之小學由小學貢天子其不躡等若此國朝崇飭人文學校徧天下瓊環海爲州在天極南文物彬彬有中土風士之聚於學廩給之養特庠於廣右諸郡建學以來垂二百年而小學獨諉置弗及講慶元改元潮陽劉公通守是邦攝府事既剔蠹夷姦民用靖安則葺學校訪儒雅思欲激昂振起之迺喟然曰古人於學自次序小學爲學者始進之階方人心未漓天機未散收而養之以固其天則德性全學力充而后大學之功成此邦逢掖之士亦衆矣然未能大有震發以雋特聞者或者教之無其漸與

於是初小學羣里街之成童既衣以佩觿且慮其亡貲從師捐公帑之羨爲錢五百緡以廩之率七十員分隸諸齋延師訓導日有課程旬有覆誦月有會試擇其優者時出清捧以勉其進又爲鬻民田募工墾耕官有閒地辟爲旁廊悉收其租俸小學廩歲入亦數百緡迄今垂髻之童執策爭奮唯恐後擲之衿佩佻達逸干城闕者咸無有焉不甯唯是公時至黌堂延太學諸生相與講明道要且寓諸文用示激勸而又脩崇宣王廟像繪彩聿加金碧交映欄宇欄楯舉整而新丹漆黝堊各極工堅曩者大比供需之費悉於養士中取給今月椿郡計之贏備科舉用毋使復侵學庠前餼廩多不時給今

如期散之儋學舊無贏祖今溢額增之它如附齋生徒不以大小悉半其供爲祭器爲庖湑爲寢浴所爲几口具莫不精媿遠而諸郡皆聞風來游雖黎獠獷悍亦知遣子就學衣裳其介鱗踵至者十餘人人謹曰前未有也歲杪公將趨朝權教授梁君永年條其事有書來請曰州之士與民同辭云瓊之學校未有如今日之盛而小學初始公之惠瓊人爲無窮可不紀諸堅珉使後有攷盍爲記之方比分麾海上嘗得奉公後遊知公設施最詳其奚辭因爲之說曰天之降材初匪爾殊長育成就上之人實爲之牛山之木嘗美矣自其萌蘖之生培植何往非美材若日聽其伐於斧斤又牛羊牧之弗卹

逮其濯濯則以爲未嘗有材無材豈山之性公今不鄙夷斯人以忠信十室故於其喜怒哀樂始發之際禁之養其清明純粹之天使之極於致知格物之妙則小學之作誦說云虜哉公名渙字伯順天姿忠淳溫厚挹之如春風和氣其豈弟慈祥之政易直子諒之教在人不知而孚士民已播諸歌謠比列其成績備詳於借恂之章諸臺行以課最聞於上它媿不勝紀述姑徇邦人小學之請於是乎特書 慶元丁巳中夏

朝奉大夫前權知瓊州軍州瓊管安撫都監溫陵莊方記武功大夫特改差權發遣瓊州軍州瓊管安撫都監龍舒長孫宗旦篆額邦人通直郎致仕林椿等立石

案慶元丁巳爲甯宗三年莊方二年來瓊三年作記劉通守名渙職官表渙作漢因形近譌當以碑爲正

瓊州府學大宋平黎頌碑

佚

粵東金石畧云紹定四年瓊山黎賊王居起爲亂明年出師又明年平之承議郎通判瓊州軍州兼管內勸農桑事借緋游寵進頌三十一章並序

案黎賊王居起作亂舊志防黎不載攷南甯軍碑記云紹定壬辰因瓊酋長王居起與本軍管下合羅黎人符先邦搆掠等語壬辰爲紹定五年碑云四年爲亂明年出師南甯軍碑云五年是出師之年其事相合防黎不載失之疏畧當據此補之

又案職官表游寵作游一龍端平年任亦誤蓋譌一爲一字龍爲一字並不攷平黎頌特書紹定四年而誤爲端平

咸淳進士題名碑佚

案咸淳二年教授蔣科建御書閣於講堂北八年立進士題名碑於東坡書院詳縣志攷瓊之登進士者始於

大觀三年符確嗣後宣和六年王志高紹興三年陳仲良二十四年趙荆鍾洽淳熙二年歐景新紹定二年陳應元淳祐十年鄧夢薦寶祐元年何一鵬四年陳國華開慶元年黃文光咸淳七年鄭真輔此皆咸淳以前登甲科者蔣廣文勒石垂後意甚善也惜其佚已久後之

瓊山縣志

卷十四

金石

十五

修金石者不爲詳載殊屬缺畧今特補之

東坡書院學田碑佚

書院在郡城東北二里元時設山長爲生童肄業之地

置學田租七十石趙孟頫書額詳縣志

案縣志不載立碑年月以趙文敏書額攷之當在元廷祐年間元時宦瓊興學校者始於拜都以延祐二年爲海北海南廉訪司副使崇重學校建三賢堂追徵欺騙學田錢七千餘緡則其時必添置學田又與文敏同時請書碑額似有可據然碑佚已久志未詳其始末不敢妄爲埶會姑考其事以質後之學者

大龍興普明禪寺碑銘佚

皇帝遣工部尚書臣士宏翰林臣世延等製大龍興普明禪寺碑文皇帝若曰昔我皇考武宗皇帝撫軍朔方朕生之三年歸繼大統在位四年而棄羣臣仁廟臨御傳之英皇是時權姦帖木迭用事構讒離間宗親近屬無所容海南之爲地炎霧吐毒往鮮生還而使朕居越歷歲年有安無苦朕於是覃思以求豈非上天垂祐祖宗洪庥而致然與乃捐金鳩工卽瓊陽之勝地建釋氏之精藍以答天地祖宗昭貺以介福於太皇太后又以綏保其民人焉創始於至治元年十月六日締構雄麗嶺海之間鬱爲奇觀朕雖未嘗躬落其成而想見其處常往來於懷也臨御之始慨念疇昔因賜名曰大龍興

普明禪寺其記朕意託諸金石俾示悠久臣世延等拜手稽首颺言曰昔者大舜歷試諸艱商王高宗舊勞於外蓋惟賢聖之資尤必困心衡慮而後膺天下之大任而行帝王之能事今陛下躬冒瘴癘備嘗險阻則其所以下悉民情上成聖德者夫豈一日之積哉且夫頓挫流離之餘人之常情豈暇他顧而陛下於茲時也曾不動其心顧方惓惓君親之恩閔閔黎民之苦不惜萬金建大佛寺以致其誠嗚呼君天下之量已見於此矣不亦盛乎且臣聞之天之所以照臨萬國者日月之明也茲於淵潛之所錫龍興之美名俾天下之人咸仰觀於隆平之效炳炳赫奕以致於萬億年而無窮又豈溟渤



之外獨得而私乎敢述銘而刻之詞曰於惟元聖受命自天本固支分正緒留傳天相厥德櫛沐風露以恬而康貞幹之固旆旆龍旂來歸孔時臣力師武至公何私肅肅青宮夙夜猷戴固辭固讓至三至再赫乎當陽思舊不忘曰我梵祠在彼海邦昔瞻廟朝莫獲近只親矚下氓顛崖病只言依佛乘自我祖宗曷旣於懷於焉作宮惟天祖宗錫我景貺茲不表章闕彼空望乃賜嘉名如日之升文臣授詔刻石以徵咨以島隅龍君海伯波瀾不驚各率厥職鏗鏘鼓舞來儀來朝內嚮而趨天子匪遙嗟嗟遠人天子念爾念爾艱食嗷徵用弛天子無爲一日萬幾孰不勞心而爾是思爾有耄老爾有婦子

均感殊眷何間遠邇蔚蔚斯文金石相宣謳歌欣愉於萬斯年 翰林學士虞集撰

案普明寺在郡城南元文宗未登極時嘗謫居此後建寺賜名大龍興普明禪寺創修顛末詳元史文宗本紀今寺久廢碑亦不存

乾甯儒學置書碑

佚

粵東金石畧云碑額乾甯儒學置書記末云至正十一年辛卯學錄廬陵羅益中撰從仕郎海北海南道都元帥府都事宋汝弼書

案元天曆二年以瓊山屬乾甯軍民安撫司故碑稱乾甯儒學府志職官表無宋汝弼名當據碑以補其闕

天寧寺銅佛存

案佛高六尺有奇大三尺尊嚴端重鑄法甚工惜無款識不知年代詢之寺僧相傳以爲前代所存攷寺創於宋而元明因之觀明初重修碑記無一語及鑄佛事則佛爲宋時舊物無疑

瓊漿井石柱題刻佚

歲壬申閏甲申鑿斯井泉汙汙德日積用日新養不窮千萬年考古銘告後人

案井在南郊舊學東洪武二十五年壬申教諭趙謙浚井並刻銘於石考謙洪武壬申年由國子典簿改任瓊山縣教諭此年閏七月故銘云閏甲中浚井當在此月

瓊山縣志

卷十四

金石

十八

今南郊舊學署東遺蹟尚存其題柱已佚不可考矣  
海南衛指揮僉事柴公墓誌銘

明威將軍海南衛指揮僉事柴公以永樂戊戌四月十日終於位年五十九冬十二月九日其孤瑄奉塋於瓊州城西南之原而以公之故人王君仲迪所述事狀因兵部員外郎陳君元宗請予銘其墓蓋予先公嘗爲瓊州守實與公相好而予嘗獲見焉則何敢辭公諱英字仲實究之曹縣人大父諱清妣王氏父諱裕元季爲安豐千戶率衆歸 太祖常從征伐積功至武節將軍正千戶洪武初守番易卒焉而公年且長矣入充參侍舍人以材武稱遂襲爲瞿唐守禦正千戶從征遼東功居

多調浙之松門又調臨山乙亥秋 詔天下武臣或其父祖與開拓之功者皆超擢於是公得海南衛指揮僉事寬厚愛人善以撫御剗弊興利人皆便焉黎寇王瓶擾澄邁公勦平之既三年授公明威將軍而以官贈其父封母薛爲太恭人妻王氏封恭人永樂丙戌 朝廷以安南黎氏父子爲不道興師討之今英國張公時爲新城侯實總戎事公以選拔在行謀報黎氏柵富良江以自固師次駝海張公令軍中造小舟舁以行至富良江聯爲浮梁且楫之以濟公及軍中驍勇者先登拔柵轉戰至東都覆其國安南次第平論功行賞有白金文綺寶鈔之賜公常立奇績皆有文符當得陞公退然不

自言識者比之馮異廣東瀕大海海外諸國皆內屬然島夷雜種時出沒寇海上己丑春指揮李珪總兵備聞公徵以自助其所以鎮撫扞衛多公策久之珪召還廣東都指揮司奏公代領其衆 詔從之公統兵萬餘巨艦五十艘諸將有位在公右者皆服屬聽指揮晝夜巡邏閱習訓練如寇至寇亦聞公名不敢近海道幾萬里其民安居樂業者皆公之惠也師駐潮州海門千戶所之前浦得風病以卒將士莫不垂涕相與具棺斂使其帳下舁歸走五千餘里至海南海南軍民無少長賢愚皆奔走弔哭嗚呼此可以觀公之德矣公忠厚謙慎色溫氣和持己甚嚴而待物甚恕征安南時部曲有得婦

女者擇以獻公公閉之一室使治女事及歸皆以給無妻者不留一人嘗道過南昌府同行者欲置酒命妓爲公歡公知之乘夜先發其以禮自持類如此王恭人鳳陽左衛千戶贈明威將軍指揮僉事興之女甚有婦道子二人其嫡琳早喪瑄甫十歲然甚似公庶幾能世其家者女一妻壽春徐榮銘曰額額柴公與時皆逢殿於海邦萬夫之雄師征安南撫順摧逆豈曰子功 天子之德海波洋洋百蠻來王公師臨之孰敢寇攘我民旣安我師亦阜公則已矣德音維茂城隅之原有業其阡刻此銘詩世世之傳

賜進士翰林院編脩文淵閣校理授脩撰泰和王直撰

文 永樂十七年歲在己亥夏月立

案碑石已佚府縣志金石不錄今從抑菴集錄俾補遺佚王直江西泰和縣人官至吏部尚書太子太保謚文端撰碑文時官編脩其父貞任瓊州太守有惠政直幼時隨官來瓊獲見柴僉事故爲作墓銘府志遺事載文端公隨父太守公郡學齋性雖端重而好遊賞有張思惠者以染作常至郡衙公喜其野朴每登臨必與之時郡俗村落鹽蜚小民家婦女多於月明中聚紡與男子歌答爲戲號曰紡場公爲思惠所導亦遍游觀因作紡場賦一時傳誦今考公抑菴集無此賦蓋悔少年游戲文字刪去不存

譙樓銅鐘存

款云海南衛指揮僉事信官張玉石玉等仝瓊州府知府程瑩發心各出俸資命匠人新鑄禁鐘一口計重二千三百二十觔永充在本衛府樓中開鳴曉昏專爲禁動鎮軍民而康泰保衛府以平甯雨暘時若國泰清安大明正統元年歲次丙辰夏四月吉旦共九十七字案職官表無張玉石玉之名惟有石麟玉是舊志脫誤無疑鐘是當時所鑄最爲有據又譙樓已圯其鐘今在府城隍廟高五尺大三十餘圍有八卦紋環繞之

重建天甯寺碑篆額

正統八年歲在癸丑孟夏之初瓊郡太守羅田程公瑩

瓊山縣志

卷十四

金石

二十一

節推宿遷乘公輅知事寶圭黃公琦等暨諸僚屬咸集於天甯寺時太守公諭於衆曰寺之佛殿迺文昌縣善士韓真祐捐資所營第以規模湫隘莫稱偉觀矧茲邦爲海外重鎮方伯連帥之所臨莅羣黎百姓之所瞻仰吾儕忝職斯土可不爲之一新乎於是議鳩工遷舊殿於後爲觀音閣重建大雄寶殿於其舊址稽度旣備傭役惟時掄材陶埴各隨方所土木日盛桴載日興工逸事遂秋八月戊申厥功告成大殿翬飛肖貌輝煌金碧相照視昔有加暨諸內外樓閣法藏與夫齋堂僧舍以次一新旣而昭勇將軍海南衛指揮鳳陽陳公瑛等捐資置買田地以爲常住之資僉以爲海外叢林之盛古

所未有宜勒諸石以垂不朽予惟佛法之興自漢以來  
遵其教者莫不壯麗其宮以榮奉之無非上以祝皇圖  
下以福斯民而已今程公於從政之餘捐資是崇是建  
其意蓋有在也豈徒徼福祉爲美觀哉雖然上有好者  
下必有甚焉外則土官主簿符忠得耆老何存等供其  
具合其志董其事與夫善士馬閏通等則另列名於碑  
陰焉於戲一時耆士上下同心恭成盛事猗歟休哉予  
老矣拙於爲文姑書此以識歲月云

賜進士出身文林郎行在河南道監察御史致仕七十  
八翁瓊山唐舟撰文 鄉貢進士廣西柳州府武宣縣  
儒學教諭瓊山吳昊篆額 瓊生伍喜書丹

案職官表推官盛輅碑作乘輅指揮陳英碑作陳瑛皆  
舊志有誤當以碑爲是寺在城北一里許此碑螭首龜  
跌在大門東邊

桐墩書院碑記

佚

琴書君子所事也因其事而留心焉以求其旨趣造其  
精妙亦已難矣其有無是而旋養其才製其具以留心  
於所事非深知篤好者吾未見其能爾也瓊山陳君文  
徽闔敏有遠識遊學庠序經籍子史百氏之書能盡得  
其要領嘗自謂書以窮理道琴以禁邪思學者必禁絕  
其邪思而後理道可明是琴與書其事雖殊而其用常  
相須然書可多積矣琴之材而中者惟桐桐又非瓊所

常產是以瓊之人多琴之好而不能皆琴之有吾竊惜之乃於郡城東五里許得一墩焉高可數尋其下平田沃壤溪流環抱正桐之所宜生也於是復加石其巔樹桐十數本且築室於麓藏書若干卷日探討其中以待桐成材而用之因名桐墩書院閒來京師屬余記惟昔王充無書閱於市肆陶淵明素琴無絃謂得其趣而不勞於音是二人者皆足於己而無及於人今陳君於琴於書既兩得其趣矣而復多聚書旋樹桐以備其用以啟迪乎後昆苟及乎鄉郡吾知瓊雖遠在海濱異時絃誦之聞無閒鄒魯將必自茲始君今膺貢而來陞於太學駸駸乎嚮用有日推其行於家者施之又將見兼善

天下而四方皆絃歌矣 賜進士第翰林學士劉儼撰案府志以爲正統間建書院攷邱文莊桐墩記云墩高丈餘去郡城東半舍許潁川陳君所築以樹桐者也君之言曰吾性嗜琴每艱得器之良者而琴之材非桐不利而桐又必石生者始佳生石矣未必面陽背陰材不良故器不完器不完故聲不揚此琴所以往往失古人之意也然瓊地素不宜桐間有之多生於平曠之野積陰之地吾用是擇勝於陽明之郊加石於積土之巔樹桐十數本庶幾後數十年得其孫枝以用於琴或可由此以得古人制樂之初意乎然非獨己用也凡吾之子弟吾之族姻吾之交游吾之鄉邑吾之後人苟有志於

古音者皆於此取材焉可也閒筆其言命予記之予以  
丁卯之秋與君別隨計之京是時墩未梧桐未樹也歲  
辛未來歸僅五春秋再踵君堂則已嶄然以高森然可  
挹矣以往觀來不出十年其材皆中於琴耶數百年不  
完之音殆於此復振耶絃誦之聲將由是洋洋乎四海  
之間而旁洽遠邇耶異日士大夫間有以琴而追蹤古  
人者必君也雖然爲十年之計者樹以木爲百年之計  
者樹以德木云乎哉君子同志友也名文徽允諧其字  
世爲瓊人連試於有司不利今貢於春官云據此則書  
院當建於景泰初年觀記云丁卯秋是時墩未梧桐未  
樹丁卯爲正統十二年又云辛未來歸辛未爲景泰二  
年又云踵君堂則此時尚未爲書院故記稱桐墩若書  
院已落成已有命名記必明言及之志以爲正統年建  
失之不攷

重修天妃廟記

碑在海口大街天后廟

中順大夫瓊州府羅田程瑩 奉政大夫瓊州府同知  
陸川楊啟 瓊州府推官長興蔡琮 瓊山縣學訓導  
寧都賴聚撰文 河南監察御史致仕唐舟篆額 滕  
縣主簿致仕周紹廉書丹  
太初未分不過水土二者故天一生水而水之載在地  
地之下與地之四邊皆海水同流故海之東西南北無  
垠而下無底非神融混冥智周寥廓能納六合於方寸



者未易與語此非下上星辰驅取以宰此胡爲烜赫威靈若是也瓊爲海中之一島周千餘里里東南密邇暹羅占城諸國西北與廉雷通爲航海往來之處非同尾閭沃焦也潮汐嚙衝浮匄澎湃陰陽闔闢氛霧滃渤奔螭幻怪之騰倒駛起吸呷欲納出沒不可言狀凡官帆賈舶之絡繹性命寄於毛粟罔不禱於著明英烈天妃廟將神力焉倚神爲閩之莆田林不詳厥諱推求其本亦蛟龍麒麟之所生而異於魚鼈犬羊者必矣神變無方未易窺測主張海道靈燄赫現遇有犯不測者出險無路入遯靡所誠心虔祈應答如響嘗有見其精爽恍惚在左右翔衛之救渡迷津保佑下土玄勲炳著肆我

朝崇祀之典特優嘉之宜乎生靈敬仰綿越千祀至今血食勿替也海口所舊有天妃廟風銷雨泐歲壞月隳羅田程侯念茲缺典慨然以起廢爲己任不以公事鞅掌而鼎作之崇其基汰其陋正殿重門回廊後室經之營之易以文棖鋟以采藻甃以瓴甃繚以垣墉咸具靡闕設像則有嚴有翼金牖煜爚禮殿則鴛瓦花磚巍然輪奐高矣美矣皆不日而成之經始於大明正統乙丑春二月吉日畢工於明年廟貌輝煌遠過於前咸請爲文以鐫諸石且曰重新之歲月不可不紀以垂於後吾思古者忠義之士盡節成名其靈爽馮依皆足以庇生民而護家國故禮云施法於民則祀之以死勤事則祀

之以勞定國則祀之能禦大災捍大患則祀之則是正  
直聰明之神禮宜祀也况稟天地萬靈之氣流行海上  
浪靜波平使舟子往來遇變不驚轉危爲安久爲海宇  
所敬事今程侯舉墜興廢敬神恤民其昭格之誠能贊  
神明而通冥漠視世之馳騖虛無夢幻泡影者大相徑  
庭是皆可書也予雖不文謹記事之梗概勒諸貞珉使  
觀者肅然起敬奉祀罔缺焉敬繫以迎神送神之辭曰  
神苞坤元兮宣揚昭靈龢兮越裳出顯入幽兮神無方  
颺雲旂兮海若藏神之來兮紫霞駟運化機兮鞭雷霆  
威宣鯤壑兮靖滄溟神之去兮陟天庭寰瀛順軌兮水  
波不興神恩汪濊兮天地清寧

大明正統十一年歲在丙寅三月吉日立

案何喬遠閩書謂神莆田之湄洲嶼人生晉天福癸卯

天福八年宋雍熙丁亥雍熙四年二月二十九日化去案自癸卯生至丁亥

四十五歲後嘗衣朱衣往來海上宣和給事中路允迪使高

麗中流獲神力特賜廟號曰順濟紹興乙卯靖海寇封

靈惠昭應崇福夫人元史祭祀志及郎瑛七修類稿言

至元中護海運有奇應加封天妃明洪武壬子亦護海

運功封聖妃永樂中建廟賜名天妃宮此碑稱天妃廟

是明初所賜頒行天下者逮清初康熙庚申十九年封護

國庇民妙靈昭應宏仁普濟天妃癸亥二十年克澎湖靖

海侯施琅上表言其靈異進封天后以春秋仲月上癸

日致祭載在祀典海口天后廟春秋由官行祭商民香火更盛

重修學廟記

正額高四丈八寸濶三尺二十一行每行四十字

瓊之有學有廟由宋及元其來遠矣世變以來淪於兵燹國朝洪武初因其地而建置之其地去郡治若干步迫於郡城之東南四方低下獨高阜擁於中周圍若干步坦平如砥廟學建焉明倫堂位於中堂之前有禮殿兩廡戟門櫺星鱗次而立四齋翼於堂之側饌堂附於其後焉歷歲以來因循修葺祀享講誦自若也天順庚辰歲秋七月十有六日暴風疾雨漂蕩衝擊其勢異常自乙夜至次日辰巳之交方明倫堂饌所齋舍兩廡

瓊山縣志

卷十四

金石

二十七

戟門之屬掃地殆盡雖禮殿巋然僅存而瓦屋漂揭穿漏如麻淋漓像塑剝落殘毀不忍仰視守土者惻然念之屬以郡事方殷閱兩寒暑未遑修復天順壬午春廣東憲副臨武鄺公彥譽分巡是郡一日謁禮殿詣明倫堂顧祝頹落憮然興感謂守土者曰學校首善之地而廟祀敦本之所也惟爾瓊郡僻居海外民夷雜處所以淑人心變夷爲夏者學校以維持之耳今陵廢若此不卽修營則祀事草率絃誦寂然士類何以作興而一方之民何所瞻仰而知向化且不負朝廷建置之意耶今與若等爲之毋勞民毋動衆務使力協而功倍可也迺得知府葉燾同知徐鑑通判米盈推官劉詔知縣陳通

欣奉美意稅司大使鄧佐董其工校官朱珪陳定陳謙  
宣共謀併力同心鳩工庇材富室輸賄閑民輸力卽其  
舊而易其新未幾明倫堂成未幾四齋成未幾兩廡戟  
門成戟門之前甃石爲泮池泮池之外護以櫺星藏修之  
所凡爲屋餘二十間東西夾於四齋之後肄射之位凡  
爲地百步許直北翼以觀德之亭焉由是師生有舍講  
誦有位游藝有所庖廚溷口畢具修舉禮殿之內白先  
師以下配享諸賢則皆整飭如式務極其美祭器則自  
籩豆罍爵之數樂舞鐘簋之屬煥然一新爰及上丁公  
則盛服有事於禮殿文武羣屬莫不畢從廟貌維新禮  
樂明備觀者如堵暨終事咸鼓舞歎息喜其功之成而

恨公之來晚也經始於是歲仲春訖工於七年仲春之  
上澣斯可謂用力協而成功倍也已惟茲盛事不可無  
傳守土謂予宜錄其實勒諸貞石以垂不朽予則拜手  
以識云

天順七年歲舍癸未孟夏之吉 教授三山朱珪撰

舉人婁琮書

先賢祠祀

佚

瓊州府舊二賢祠祀知府王徐二公者也王公諱泰字  
伯貞以字行吉之泰和人洪武間以前戶部主事起知  
瓊郡爲政寬簡州黎殺人報讐府衛以反聞議用兵公  
保其無他捕讐殺人者數人遂定瓊田三穫軍賦不時

受俟民乏則急斂而倍入之公始令每穫必輸皆告便民流來歸者萬三千餘人任治十五年以內艱去民號泣攀送十餘里不絕徐公諱鑑字子明常之宜與人宣德間自戶部郎中奉勅知瓊廉正寡慾瓊多異產中使踵接公限有司弗予及行所部輒遣騎從之使不得肆武官利黎產多啟釁以邀賄公鎮以無事皆按堵不爲變民漸黎俗病不服藥惟殺牛祭鬼至鬻子女爲禳禱費公婉導之民皆感化立生祠祀公比其卒巷哭家祭柩還送者填海濱日送其舟至不見乃去蓋其治祇四年視王公不及三之一而治狀相若人以爲難瓊民思二公不置附祭於蘇文忠公祠事有不平者則往訴之

若官府然成化初知府蔣琪建祠於府治西久乃就圯宏治初知府張英改建於御史行臺之右則今祠也賜進士第翰林院侍講學士充東宮講官茶陵李東陽撰

案張太守成化二十三年來瓊文莊公有贈序其改建先賢祠在弘治初年茶陵撰文刻石云祠在御史行臺之右卽今道署之右至十年提學僉事宋端儀移祀二公於府學仰止祠其舊祠遂廢

旌表李節婦碑銘

景泰乙亥春二月丁丑瓊州府臣黃瓚言瓊山縣知縣臣陳用已上所部士民邱傳妻李氏年二十有八孀居

守節其事甚備案李氏本澄邁縣富家女克自儉約嫻女工歸傳執婦道彌謹傳邁疾昕夕左右目不睫者八閱月傳疾殆以老親稚子爲託李泣而受命旣卒殯殮撫棺哀號幾絕者數喪畢蓬垢不飾甘苦辛以終身示無他志舅姑生養死葬必以禮撫育其子教之勉之必於成立長子源克紹祖業醫學訓科次子濬首鄉薦第進士入翰林爲編修以文學名而李氏貞節顯白自少壯至老如一日尤爲鄉里所歎服跡其所能當與古貞女節婦儷美伏惟聖朝敷治恒重綱常若李氏者宜加旌褒以勵風俗臣昧死上請事下禮部移文憲臣覈實又明年爲天順丁丑憲臣奏如瓚言禮部請如故事表

其門曰貞節彰示無窮制曰可成化丁亥濬進官侍講學士請爲之銘銘曰

兩儀肇分綱常爲大治道攸關天經斯在世降俗移人僞日滋遭罹變故鮮或不虧猗歟夫人資稟特異孝友溫純惟勵其志厥初在家恭儉是敦乃及於行克媿德門有斐君子而弗偕老敬受遺命耄嬰之保號天自誓勤勵以居冰清玉潔守志弗渝下撫上承克慈克孝舅姑令終子有成效伯任鄉邑仲顯朝廷厥家再振里衍增榮烈貞節孝慈嚴兼美從古迄今孰盛與比郡侯列奏上感聖明錫恩旌表以樹風聲奕奕高閎前題貞節勒銘石陰昭示無極

賜進士及第經筵講官兵部尚書太子少保兼文淵閣  
大學士福安彭時拜撰

案銘勒貞節坊石陰在文莊故里今碑石傾圮已碎數  
段銘詞猶可句讀

黃堂鎮靖碑

存高五尺有奇濶二尺八寸

案碑字大一尺六寸成化四年戊子十一月之吉立其年  
月分刻碑兩邊字大一寸有奇不記姓名攷名宦傳蔡  
浩成化初由御史陞守瓊州廉明務大體治民如治家  
玩法怙終者則必不貸其當日實心實政已可想見碑  
立於成化四年必是爲蔡郡守而立者

府學祭器碑

存高四尺八寸濶二尺五寸

瓊山縣志

卷十四

金石

三十一

粵稽我朝建國之初秩祀百神咸惟其舊獨於先師孔  
子之神祀用木主以易塑像蓋不敢以百神例視之也  
至於祭器之用雖郊廟之大亦惟用時器獨於天下郡  
縣學春秋丁祭用古禮器焉得非以天地山川之祭爲  
人以祀神宗廟百神之祭因世以異用皆可隨時以制  
宜若夫先師之祭則主於明道以立教報本以復古故  
不容於不異耶夫禮器與樂音同一其質樂有八音而  
祭之器籩質以竹鼎質以金登質以土豆俎質以木尊  
壘之屬或土或金形殊而質亦不同近世以竹木之類  
易壞而或不能以堅久一切範金代之以圖其永其形  
則是其質則非蓋主於用而不泥於其故茲禮所謂先

王未之有而以義起者乎瓊郡學祀舊有祭器久而廢壞弗備成化辛卯廣東按察副使豐城涂君伯輔奉璽書來飭兵備下車之始未遑他務首市銅鳩工博考古圖像按其制製之其爲器爵百四十而奇一籩七十有二豆如籩之數簠簋各四十有四鉶十有二登五尊三總其凡三百九十餘事費一出於官而民弗與知以明年春二月上丁將釋奠於先師先期舍菜以告其成釁而藏之庫春秋有事出而用之時相其成者掌海南衛事都指揮王君璲瓊州府吳君琛瓊山縣梁君昕府學教授陳君禹輩也會予以憂制家居免喪行有日矣王吳二君謂予出自斯學且以文字爲職業請記其數使

後之人有所稽而守焉弗敢放失昔衛靈公問陳於孔子孔子對以軍旅未學而欲告以所聞俎豆之事惜其蔽錮而不能再問至今餘憾千載雖然頰宮之詩聖人躋之於頌其意蓋在茲歟今憲副君奉命以治軍旅之事顧能汲汲然以俎豆爲先盡心力考載籍倣古制度備其器以用於崇儒重道之祀其蓋有得聖人微意於千載之下也哉是則可書非但紀其成具其數以示夫後之人也而於其設施先後之序亦可槩見於斯云  
賜進士第翰林院侍講學士國史館纂修充經筵講官  
郡人邱濬記 成化八年四月望日  
按碑陰刻尊爵籩豆簠簋鉶登等器今尚存犧尊象尊



爵劔五十餘件亦足見先代禮器留貽尤宜永保用之  
府文廟銅鼓

其製圓若輪而空其中高尺有四寸徑二尺八寸圍八尺四寸兩旁綴耳高一尺二寸滿鼓回字花紋極工緻面平周銜線抵臍凡八圍每圍線三條身凡二十一圍每圍如面之線重五十餘斤無製造年代相傳與禮器同時所鑄考文莊祭器碑記文無言及銅鼓則非同時所鑄可知然確是代遺器尤可寶貴

宣宗御製洪範敘碑

尚書一經皆聖人治天下之大經大法而莫詳於洪範一篇蓋天以啟禹禹敘爲九疇而大綱著箕子推衍成

篇而衆目備治天下之法未有加於此者九疇皇極爲之主而皇極人君爲治之心法也卽疇而觀前四疇皇極之所以立後四疇皇極之所以行始終皆歸於極故曰九疇之主也推本而論五事之要故曰人君爲治之心法也蓋人君建極於上極建而福集福非徒厚其一身凡天下之人皆於人君之極保而不失天下之福也夫首五行本諸天也五事以誠身而八政以厚民也五紀以合天也三德以治人而稽疑以辨惑也庶徵以省驗而福以勸懲也皇極之體用備矣蓋天以二氣五行生育萬物而理行乎其中人君以其理脩己治人而氣參乎其上故九疇於天道人事皆互言之治天下之治

豈有加乎此哉於乎斯疇也天以畀禹而非箕子之發  
明久將晦矣武王之訪箕子之傳殆亦天啟之歟朕反  
覆究心未嘗厭也幾務之暇嘗親書之間以所得及聞  
諸儒先者撮其大要於簡首庶幾體而行之云  
右宣宗章皇帝御製洪範敘凡三百七十六言臣涂棐  
拜手稽首敬書而勒之貞珉 成化壬辰春既望中憲  
大夫廣東等處提刑按察司副使臣涂棐謹志 碑在  
瓊山縣學署

朱子齋居感興詩碑

高八尺有奇濶每面各二尺面分九  
行三十八字大二寸許俗稱四

碑方

昆侖大無外芴薄下深廣陰陽無停機寒暑互來往皇

瓊山縣志

卷十四

金石

三十四

犧古神聖妙契一俯仰不待窺馬圖人文已宣朗渾然  
一理貫昭晰非象罔珍重無極翁爲我重指掌

吾觀陰陽化升降八絃中前瞻既無始後際卹有終至  
理諒斯存萬世與今同誰云混沌死幻語驚盲聾

人心妙不測出入乘氣機凝冰亦

朱子大全集  
攷異作更

焦火淵

淪復天飛至人秉元化動靜體無違珠藏澤自媚王韞  
山含輝神光燭九垓元思徹萬微塵編今寥落歎息將  
安歸

靜觀靈臺妙萬化從此出云胡自蕪穢反受衆形役厚  
味紛朶頤妍姿坐傾國崩奔不自悟馳驚靡終畢君看  
穆天子萬里窮轍迹不有祈招詩徐方御宸極

涇舟膠楚澤周綱已陵夷况復王風降故宫黍離離元  
聖作春秋哀傷實在茲祥麟一以踣反袂空漣洏漂淪  
又百年僭侯荷爵珪王章久已喪何復嗟歎爲馬公述  
孔業託始有餘悲拳拳信忠厚無乃迷先幾  
東京失其御刑臣弄天綱西園植姦穢五族沈忠良青  
青千里草萊時起陸梁當塗轉凶悖炎精遂無光桓桓  
左將軍仗鉞西南疆伏龍一奮躍鳳雛亦飛翔祀漢配  
彼天出師驚四方天意竟莫回王圖偏不昌晉史自帝  
魏後賢盍更張世無魯連子千載徒悲傷  
晉陽啟唐祚王明紹巢封垂統已如此繼體宜昏風塵  
聚瀆天倫牝晨司禍凶乾綱一以墜天樞遂崇崇淫毒

穢宸極虐焰燔蒼穹向非狄張徒誰辦取日功云何歐  
陽子秉筆迷至公唐經亂周紀凡例孰此容侃侃范太  
史受說伊川翁春秋二三策萬古開羣蒙

朱光徧炎宇微陰眇重淵寒威閉九野陽德昭窮泉文  
明昧謹獨昏迷有開先幾微諒難忽善端本綿綿掩身  
事齋戒及此防未然閉關息商旅絕彼柔道牽

微月墮西嶺爛然衆星光明河斜未落斗柄低復昂感  
此南北極樞軸遙相當太一有常居仰瞻獨煌煌中天  
昭四國三辰環侍旁人心要如此寂感無邊方

放勳始欽明南面亦恭已大哉精一傳萬世立人紀猗  
歟歎日躋穆穆歌敬止戒熒光武烈待旦起周禮恭惟

千載心秋月照寒水魯叟何常師刪述存聖軌  
吾聞包犧氏爰初闢乾坤乾行配天德坤布協地文仰  
觀元渾周一息萬里奔俯察方儀靜隕然千古存悟彼  
立象意契此入德門勤行當不息敬守思彌敦

大易圖象隱詩書簡編訛禮樂况支喪春秋魚魯多瑤  
琴空寶匣絃絕將如何攷異作奈何興言理餘韻龍門有遺

歌

程子晚居  
龍門之南

顏生躬四勿曾子曰三省中庸首謹獨衣錦思尚綱偉  
哉鄒孟氏雄辨極馳騁操存一言要爲爾挈裘領丹青  
著明法今古垂煥炳何事千載餘無人踐斯境

元亨播羣品利貞固靈根非誠諒無有五性實斯存世

瓊山縣志

卷十四

金石

三十六

人逞私見鑿智道彌昏豈若林居子幽探萬化原

飄飄學仙侶遺世在雲山盜啟元命祕竊當生死關金  
鼎蟠龍虎三年養神丹刀圭一入口白日生羽翰我欲  
往從之脫屣語非難但恐逆天道偷生詎能安

西方論緣業卑卑喻羣愚流傳世代久梯接凌空虛顧  
盼指心性名言超有無捷徑一以開靡然世爭趨號空  
不踐實蹟彼榛棘途誰哉繼三聖爲我焚其書

聖人司教化巒序育羣材因心有明訓善端得深培天  
敘旣昭陳人文亦褰開云何百代下學絕教養乖羣居  
競葩藻爭先冠倫魁淳風反淪喪擾擾胡爲哉

童蒙貴養正孫弟乃其方雞鳴咸盥櫛問訊謹暄涼奉

水勤播灑擁簪周室堂進趨極虔恭退息常端莊劬書  
劇嗜炙見惡逾探湯庸言戒粗誕時行必安詳聖途雖  
云遠發軔且勿忙十五志於學及時起高翔  
哀哉牛山木斤斧日相尋豈無萌蘖在牛羊復來侵恭  
惟皇上帝降此仁義心物欲互攻奪孤根孰能任反躬  
良其背肅容正冠襟保養方自此何年秀穹林  
元天幽且默仲尼欲無言動植各生遂德容自清溫彼  
哉夸毗子咕囁徒啾喧但逞言辭好豈知神鑒昏因余  
昧前訓坐此枝葉繁發憤永刊落奇功收一原

右晦菴朱子齋居感興詩成化癸巳冬十有二月甲子  
賜進士第中憲大夫廣東按察司副使豐城涂棊伯輔書

案碑四面皆隸書蒼勁古逸深有魏梁鵠孔子廟碑筆  
意最爲難得款字差小皆楷書前在府學宮今移建府  
署東邊其舊址改建雁峯書院碑在講堂下東階

藏書石室記

佚

予生七歲而孤家有藏書數百卷多爲人取去其存者  
蓋無幾稍長知所好取而閱之率多斷爛不全隨所有  
用力焉往往編殘字缺顧無從得他本以考補時或於  
市肆借觀焉然市書類多俚俗駁雜之說所得亦無幾  
乃徧於內外姻親交舊之家訪求質問苟有所蓄不問  
其何書輒假以歸顧力不能鈔隨錄隨卽奉還然必謹  
護愛惜冀可再求也及聞有多藏之家必豫以計納交

之卑辭下氣惟恐不當其意有遠涉至數百里轉浼至十數人積久至三五年而後得者甚至爲人所厭薄厲聲色以相拒絕亦甘受之不敢怨懟期於必得而後已人或笑其癡且迂不恤也不幸稟此凡下之資而生遐僻之邦家世雖業儒然幼失所怙家貧力弱不能負笈擔簞以北學於中國中心惕然思欲以儒自奮以求無愧於前人反求諸心似知所愛慕者甚欲質正於明師良朋引領四顧若無其人不得已而求之於書書又不可得而求之之難有如此者乃喟然發歎自盟於心曰某也幸他日苟有一日之得必多購書籍以度藏於學宮俾吾鄉後生小子苟有志於學問者於此取質焉無

若予求書之難庶幾後有興起者乎歲己未補郡庠弟子員甲子領鄉書戊辰上春官卒業太學甲戌第進士卽入翰林自此日積月累所得日多歲庚寅丁先妣憂歸故鄉服闋謁先聖於學宮怵然動其宿盟顧南方卑濕竹帛不可久藏竭生平積聚鳩工鑿石以爲室凡梁柱楹瓦之類皆石爲之不用寸木廣若干尺長若干尺經始某年某月落成於癸巳年七月爲錢若干督其工者鄉友吳雲也中爲木櫃若干內度以書僅成予卽北上竊恐後人不知予得書之難而易視之或者又取之以去也乃自書其事而爲之記曰書之功用大矣由一理之微而可以包六合之大由一日之近而可以盡千

古之久由一處之狹而可以通四海之廣由一事之約而可以兼萬物之衆其惟書乎嗚呼聖人沒也久矣而道德萬世如見古人往也多矣而事業終古常新合千萬世之心術聚千萬世之心迹傳千萬世之語言演千萬世之理道皆於書乎是賴士也生乎千年之後而知乎千年之道具乎一物之形而悉乎萬物之理處乎一室之間而周乎萬里之勢非書何以致之哉人生天地間不爲儒則已有志於儒以從事乎聖賢之道未有舍書而能成者也古語有之通天地人曰儒一物不知儒者所恥一書之不讀則一書之事缺焉書之在天下自五經而下若傳若史若諸子若百家上而天下而地中

而人與物固無一事之不具亦無一理之不該學者誠卽是而求焉則可貫三才而兼備乎萬物之理儒之道其在是矣雖然書不貴多而貴精學必由約而後可以致於博精而約之以盡其多與博則氣質由是而變化心志由是而開明德業由是而崇廣析其精而志於不亂合其大而極於無餘會其全而備於有用聖賢之道夫豈外乎是哉區區積書之心誠有在乎是所以期待吾鄉之後賢君子者甚遠且大其必有副予望者乎使誠有之恨予耄矣不及見也雖然冥漠之中無知則已萬一有知亦將暢然快輾然笑也謹書此以俟若其規條名目則悉具於碑陰

案文莊公石室成於成化八年癸巳作記刻石卽在其時至萬曆時重修學宮建尊經閣移其藏書於閣中以石室貯文莊公世史正綱朱子學的遺稿會稿墨板忠介作記俱載其事逮 國朝石室已廢其遺跡在今府學宮後山之麓

### 瓊山學碑記

孔子生於魯魯之南境則楚北境則齊當孔子時楚竟淪蠻荆齊必一變而後可至魯魯聖人之鄉也亦必一變而後可至於道焉然當孔子世魯之治化竟未聞其能於變而底於時雍之域况今去聖人之時餘二千年之久距聖人之居幾一萬里之遙者乎瓊在禹貢荒服之

### 瓊山縣志

#### 卷十西

金石

四十

外漢武元鼎中始入中國其去聖人之居甚遠服聖人之教最後其於聖人之道蓋聞風而興起非有所觀感而過化者也然今日衣冠禮樂之盛固無以異於中州其視齊魯或可媲美豈孔子乘桴浮海之歎豫有定於千載之前萬里之外哉瓊山縣居郡郭下郡有瓊山譬則人身之有首面邑有學校譬則首面之有眉目也茲邑實爲諸邑之首其學校亦視諸學爲冠邑有學肇於宋始遷今地則在洪武九年自是以來雖屢加脩繕而僅取苟完無經久計成化乙酉廣東按察副使會稽唐君質夫行部至瓊乃始發官貲俾知府清漳察君叔清修復明倫堂暨宗禮養正二齋功未就緒歲辛卯憲副



豐城涂君伯輔奉璽書專鎮海南留心學校乃市旁近地以廣學基兼助其費已畢前功又創會饌堂及號房三十間知縣事五羊梁昕預力其間訓導高涼周書專董其事既訖工以記見屬予邑人也知瓊之教事爲詳說者謂瓊士未知學蓋自宋姜君弼從學蘇公子瞻始殊不然公作伏波廟記謂自漢末至五代中原避亂之人多家於此今衣冠禮樂蓋班班然矣觀公此言則未渡海以前已有衣冠禮樂之盛至公始益變爾洪武中姚江趙謙古則來典教事一時士類翕然從之文風用是不變至今瓊人家尚文公禮而讀孔子書一洗千古介鱗之陋出而牝仕於中州中州士大夫不敢鄙夷之

者未必無所自也謂非學校教學之功可乎今世學校所以爲教者非六經孔孟之言在所擯斥三尺童子人知性之本善而有荀董揚韓之所不及知者豈今世童子固勝於前世鉅儒乎教素行也教行則道明推諸四海而準瓊處大海極南之陬去齊魯幾萬里而道之彰彰著明如此是知聖人浮海之歎不行於稅駕之時而著於奠楹之後蓋百世可知也昔之學者不遠千里裹糧負笈以從師於遠今聖人之道與王者之化並駕而偕行隨在而有經有常說不假於辨難學有常師不假於外求居有常所不假於游從食有常廩不假於經營今之爲學者固易於古人數倍矣於此而不知所以

自勉焉甚至於自暴自棄豈非聖<sup>世</sup>棄材名教之罪人也哉予忝生是邦於邑士爲鄉先達故因記學之成廣憲副公作興之盛意而規之以言非獨警於今且以示來者於無窮云 賜進士第翰林院侍講學士充國史館纂修邑人邱濬撰文

案碑立於成化九年在南郊舊學宮至宏治十一年副使陸淵遷建於府學之西其碑遂廢憲爲重刻碑在縣文廟

### 表賢亭記

佚

四賢皆發軔巍科接踵要路猷爲足以匡弼時政風裁足以激揚濁清文章足以補助道化實瓊人之師海內

### 瓊山縣志

#### 卷十四

金石

四十二

之望也且其家庭孝友之稱鄉黨信義之行又瓊人耳目所逮聞飫見脫無上人之表著當亦有感民興之效矧復建亭表其里以聳民觀瞻乎風聲所樹動人移物將勃然莫之能禦也榮忝職提學風化攸司嘗叨聯侍從於諸賢之後是舉也憲臣尚德不尚威瓊士丕式於前必有丕承於後也遂不讓而書此於石

賜進士出身按察司僉事兼提督學校新喻胡榮撰并書案廣東通志胡榮成化七年任按察司僉事以時考之亭建於八年

又案胡榮重修濂溪書院記云天順癸未予提學來廣閒卽於祠後演極堂召諸生講論厭市喧密邇明年監

察御史涂公伯輔按部至癸未爲天順七年明年爲八年至成化七年伯輔兵備來海南建亭以表薛遠邢宥邱濬林傑爲四賢亭故在城西今廢

飭邊亭記

篆額高五尺有奇濶二尺

按碑在大教場成化七年間副使涂棐所建以勅書內飭邊二字名其亭翰林張元禎撰文年久陷入地中國朝郡丞潘廷侯磨刮苔蘚出之俗誤稱定風碑余親至碑下剔苔不能辨一字惟石額四篆字隱隱可見

重建靈山祠記

距瓊城之東不十里踰河而南行二三里許有山鬱然林木葱蒨按舊牒初名黑山山有二祠一祀神有五一

瓊山縣志

卷十四

金石

四十三

祀神一鄉民遇疾疫禱者均無不應春秋率衆祀之惟謹然皆莫考其履歷其在宋元時已封曰靈山曰通濟曰香山曰瓊崖曰定邊曰班帥皆有大王之號遂稱今名而所祀惟一神者蓋班帥也厥後二祠俱燬於兵我太祖高皇帝混一區宇主典神天洪武三年以神祇舊加封號多瀆禮□禮不所司悉俱以聞瓊州以神爲有功於民言乃得正今號曰靈山之神自通濟以下咸如之著之祀典復新其祠通以班帥合祀爲六而民之邀福利者益衆每歲莫春之九日郡之長貳率僚屬遵禮典以牲醴致祭祠下閱歷旣久祠日就敝前此葺者不過補頽易蝨而已成化辛卯春予奉璽書撫鎮茲土嘗

謁神焉顧瞻祠宇庠陋莫稱間以歲旱連月不雨農之  
灌者既疲官之雩者亦困苗將萎死既盡然可傷詢諸  
父老盍於名山大川禱祈之僉以神對遂遣瓊山知縣  
梁昕竭誠以往應期雨集歲收以豐自是早則禱之輒  
澍癸巳秋梁昕請大其祠以答神貺乃舉金之在公爲  
兩者貳百俾之市良材於海北卽土俗所謂鐵力木者  
皆冒鯨波之險而至擇耆民王貢符昌以董役事成撤  
其舊而新之祠凡七楹前爲廳四楹廳之兩翼爲齋宿  
庖漙之所繚以周垣外爲大門以時開閉於是知府吳  
琛同知馬叔文通判陳韶推官顧顥實皆綜理程督用  
纘告成高明壯麗倍蓰於昔誠可以揭虔而妥靈也予

嘗以其山爲瓊之勝地故顏其廳曰海岳英華惟夫天  
下名山卒能興雲致雨而利濟民物然亦莫不有神以  
尸之故其大者天子所以望秩其小者皆得於方牧以  
祈以報寧非禮之所宜乎爰識歲月於石復作迎享送  
神辭遣使者歌以侑之辭曰

神之來兮馭雲駟鳴珮玉兮聲冷冷旌旗蔽空兮祥颿  
滿庭蕉黃荔丹兮穀醕惟馨執事駿奔兮罔或不誠拜  
稽首兮酬爾炳靈神之去兮去無方雲黯澹兮山蒼蒼  
望不見兮我心孔傷冀留澤兮輯寧我疆以和易沴兮  
化歉爲穰千秋萬歲兮報事不忘  
賜進士第中憲大夫奉 旨整飭兵備廣東按察司副

使豐城涂棐撰並書 成化十二年歲次丙申春正月  
吉日中順大夫瓊州府知府莊琪立石

案記中推官顧顥府志官職表無其名成化年任有傳  
禹必是顧顥之譌當以碑爲是

天寧寺銅鼓

存

款云廣州府番禺縣客人李福通喜捨資財鑄造銅鼓  
一面在於瓊州天寧寺大洪寶殿永遠供俸祈愿佛日  
增輝風調雨順國泰民安者皆大明成化十三年三月  
吉日造共六十六字環鼓面旁邊

邱母李太夫人諭祭碑

成化七年歲次辛卯二月甲辰越七日庚戌

瓊山縣志

卷十四

金石

四十五

皇帝遣瓊州府知府吳琛諭祭翰林院侍講學士邱濬  
母太夫人李曰守節教子婦人所難兼致旌褒惟爾所  
獨生有足尚死可悼傷爰超常典特賜以祭爾靈不昧  
尚克享之

案太夫人卒於成化五年三月初七日文莊公五月在  
京聞訃始奔喪歸家是年諭祭正當營葬之時以翰林  
學士其母得邀諭祭在有明亦所僅見宜公盡忠圖報  
死而後已

瓊州府儒學記

高五尺四寸

二寸濶二寸八寸三十二行行六

宏光紀元廣東憲副新淦陳公朝彥分巡海南道奉璽  
書整飭兵備越明年武事旣脩四境無虞詣郡學謁先

聖禮成周覽惟大成殿宏壯可觀至於廡門庖庫以及師之分教之齋生之肄業之舍卒腐朽弗稱上兩旁風日就傾圮公仰歎曰學校首善之地風化之原斯民之具瞻誠司政教者之先務也顧庠陋若是非缺典與乃命有司庀材鳩工不亟不徐經始於宏治二年己酉八月訖功於三年庚戌正月凡爲殿之左右兩廡若干楹櫺星門戟門雲鼓石柱各十二神厨祭器庫各若干間堂之東西四齋若干增肄業舍若干間修會饌堂若干間樹儒林坊於通衢且按舊碑詢父老復勢要侵學之左田若干畝學之後塘大小二方相連仍於殿堂悉加潤色丹漆黝堊咸極堅緻既完且美輪奐一新高明闔

爽壯觀郡邑是舉也費自公出而民不憚勞有司告成於公而落之闔郡士民咸樂趨覩諸生唐顯祖等懽忻踴躍謀勒石以傳教授南海吳君元走倅奉書幣來徵予記夫學校之設其來尚矣殿廡以祀先聖先賢堂齋以居師生裸將以時餼廩有數御製諸書屢行頒降申勅憲臣專董學政下至掃除供給之役罔不備具無非欲風厲天下之爲師爲弟子者知所以教與學以明夫先聖之道而達於三綱五常民彝物則之理以自新其德而推以新民焉夫瓊之爲郡自漢武平南越始置厯晉隋而唐尋置瓊筦至宋慶厯以後學制始備迫入皇朝洪武三年卽詔天下府州縣立學百餘年來祖宗列

聖教化涵煦之深而瓊南文獻之盛與中州相埒天下  
稱爲海濱鄒魯往往豪傑之士由科目以進率以碩德  
傅學知名海內致位卿相於古人固不多讓自今聖天  
子飛龍之初政治維新復得賢監司奉宣德意留心學  
校重加修建而作新之則後之來者孰不揚眉吐氣激  
昂奮發爭自濯磨而圖惟自新也耶自新何如亦曰居  
敬窮理以極吾心之全體大用而已蓋心者鏡也鏡常  
磨則塵垢去而光明發心常敬則人欲消而天理明由  
是講學以明理遷善以改過洗滌澡雪弗懈益勤則既  
有以自新其德矣其於新民也夫何難焉今諸士其尚  
知所務哉易曰大畜剛健篤實光輝日新其德書曰惟

新厥德終始惟一時乃日新詩曰日就月將學有緝熙  
於光明必如是而後爲自新必如是而後能新民異時  
取科第以有名位以宇宙爲吾分內樹勲業於當時流  
聲光於百世爲孝子爲忠臣爲良牧使民風丕變民德  
皆新以追皋夔稷契以傳周召望散之躅而輔成國家  
雍熙泰和之治於無窮斯不負公今日修建作新之盛  
心若徒從事於詞章記誦之習以媒仕進階利祿而已  
則固非諸士所自期待而非賢守之所望於諸士也惟  
去舊習以求新知諸士其敬念之哉予喜憲副公之樂  
於興學而重吳君之請故爲記之俾刻諸貞珉以俟  
賜丙戌進士第文林郎監察御史奉敕提督畿內學政

後學順德張泰撰 宏治四年歲次辛卯夏四月朔旦  
案明史文苑傳有張泰太倉人官翰林院修撰別是又  
案府縣志據黃通志皆以徵予記爲完篇以下不錄一  
字是其採輯疏漏今碑存府學明倫堂余手搨全碑備  
錄其文以補舊志之缺又考職官表副使陳英碑作朝  
彥疑是別號

重建海口觀音堂記佚

賜從一品服進士出身奉勅提督軍務廣西按察司僉  
事前監察御史瓊臺李珊撰文 奉政大夫直隸太平  
府同知李昌書丹 時宏治七年歲在甲寅冬十月望  
日

瓊山縣志

卷十四

金石

四十八

大學士邱文莊公諭祭碑

宏治八年春三月初二日

皇帝遣禮部尚書倪岳諭祭於故光祿大夫少保兼太  
子太保戶部尚書武英殿大學士邱濬曰惟卿早擢高  
科歷事累朝博學能文名聞允昭簡在朕心置卿近密  
入告謀猷每多裨益胡爲嬰疾竟爾告終爰念往勞深  
惻予衷特頒卹典有贈有諡給驛還喪并賜塋祭君臣  
義篤終始克全卿靈如在其歆鑒焉

特賜諡策文碑

宏治八年春三月十二日奉

天承運皇帝制曰朕爲贊幹化機必資壽考訏謨治□



須藉傳聞故既優其請老之期而復厚以恤終之典故  
光祿大夫柱國少保兼太子太保戶部尚書武英殿大  
學士邱濬海邦間氣翰苑名流績學羣經留心庶務久  
居清祕晚佐鈞衡官八轉而至三孤於今爲重壽七旬  
而加五歲在古尤稀方深倚任之懷弗聽歸休之請踰  
年賜告一旦云亡天不憖遺朕殊傷悼茲特贈太傅特  
進左柱國諡文莊於戲朝以爵鄉以年並繫一時之聖  
官有贈行有諡永貽百代之榮不朽者存尚其歆服  
又諭祭碑

宏治八年春三月十四日

皇帝遣禮部左侍郎徐瓊諭祭故光祿大夫柱國少保

瓊山縣志

卷十四

金石

四十九

兼太子太保戶部尚書武英殿大學士贈太傅特進左  
柱國諡文莊邱濬曰卿以文學擢居重任方切倚毗遽  
云長逝中心悼傷其何能已茲臨三七特用遣祭卿靈  
不昧庶其歆享

光祿大夫太子太保武英殿大學士贈太傅諡文莊邱公  
神道碑

賜進士第資政大夫刑部尚書致仕何喬新撰文  
宏治八年春少保兼太子太保戶部尚書武英殿大學  
士邱公以疾卧家連章乞致仕優詔不允遣醫賜藥中  
官問疾賜食物是歲二月戊午薨於城東私第訃聞天  
子嗟悼輟朝一日賻寶鈔一萬貫贈特進左柱國諡文

莊命禮部尚書倪岳左侍郎徐瓊諭祭葬及祥禫亦皆有祭遣官次第行之工部差官造墳及官其孫留尚寶司丞仍命行人宋愷護其喪歸將以丙辰年十二月乙酉日葬於五龍池之原時喬新致仕家居留遣使以公門生翰林院編脩蔣冕所述行狀求玄堂之銘且致其祖母夫人之言曰公治命也幸毋辭予憶在朝時公暇輒與公相過從論古今事得失公嘗語予曰予與子相知不啻君實景仁不幸死則後死者銘之予曰諾意公言直戲耳別去四五年公猶不忘前言乃知非戲也嗚呼方今作者如林子何人敢銘公墓然欲固辭又負公久要之言乃敘而銘之公諱濬字仲深其先世家泉之

晉江元季有官於瓊者遭亂不能歸遂占籍瓊山曾祖諱均祿隱居不仕祖諱普臨高醫學訓科考諱傳賢而早卒及公貴曾祖考皆贈官同於公曾祖妣李氏祖妣柯氏妣李氏皆贈一品夫人公舉進士改翰林庶吉士與修寰宇通志書成擢編修憲宗皇帝卽位初開經筵以公充講官有白金文綺之賜成化元年以九載秩滿陞侍講修英宗皇帝實錄陞侍講學士丁母夫人憂解官歸服闋詣京復舊職奉命修宋元通鑑綱目成陞翰林院學士十三年陞國子監祭酒十六年進禮部右侍郎仍掌監事二十三年冬陞禮部尚書掌詹事府事修憲宗皇帝實錄公充副總裁宏治四年八月實錄成加

太子太保職如故是歲十月命兼文淵閣大學士入內閣司制誥典機務公三上章辭上不允久之乃就職七年陞少保改戶部尚書武英殿大學士仍兼太子太保自始仕至今四十有二年矣公少孤力學六歲能詩弱冠著論謂許文正公仕元無能改於其俗又不得行己之道不仕可也耆儒碩師見其論初甚駭之已而又大服以爲先儒未有言及此者正統甲子舉於鄉爲廣東鄉試第一名兩試禮部名在乙榜當授教職辭卒業太學祭酒蕭先生鎡深器重之爲之延譽繇是名益重景泰甲戌復試於禮部名在前列廷試第二甲第一名及選爲庶吉士讀書祕閣自六經諸史九流箋疏之書古

今詞人之詩文至醫卜老釋之說靡不探究發之文章雄渾壯麗四方求者沓至碑碣銘志序記詞賦之作流布遠邇然非其人雖以厚幣請之不與修英廟實錄或謂少保于謙之死當著其不軌之迹公曰己巳之變微于公天下不知何如武臣挾私怨誣其不軌是豈可信哉衆以爲然功過皆從實書之兩廣用兵公上書李文達公且陳平寇方畧文達上之詔以策付總師其後削平用公策爲多時經生文士爲文以奇怪相高或不可句讀公考南京鄉試及禮部會試怪詞險語必痛斥之怨誹不恤也及爲祭酒尤諄諄爲學者言之文體乃復渾厚士有慕道學者或過爲險異之行以邀名因考會

試發策言之士乃知道以中庸爲至詭異不足貴也其在大學論者謂師道尊嚴無愧李文忠公綜理微密則文忠不及嘗謂朱子家禮最得崇本敦實之意然儀節疏畧爲考諸儒所言作家禮儀節使好禮者可舉而行朱子微言散見傳注語錄學者卒未易求乃采其精切者彙爲二十篇倣魯論語作朱子學的朱子綱目以正統爲主然秦隋之未有不可遽奪漢唐之初有不可遽予者乃作世史正綱著世變之升降明正統之偏全又謂西山真氏大學衍義有資治道而於治國平天下之事缺焉乃采經傳子史有及於治國平天下附以己見作大學衍義補今天子嗣位之初公書適成乃表上之

上覽之甚喜批答有曰卿所纂書考據精詳論述該博有裨致治朕甚嘉之賜白金二十兩紵絲二表裏陞公尚書且命錄其副書坊刊行憲廟實錄成賜白金八十兩羅緞八表裏仍遷官宮保踰月遂有入閣之命蓋簡在上心久矣公雖辭溫詔勉飭不允所辭公在位務以寬大啟上心忠愛變士習凡人才進退政事廢舉一惟祖宗舊典是循上二十二事陳時政之弊又請訪求遺書上皆嘉納洪武永樂以來凡百司朝覲命吏部都察院考其尤不職者乃黜之不過數十人其後吏部患人言務以多黜爲公方岳以下少有微瑕輒黜之黜者亦不敢訴公深知其弊言於上曰唐虞三載考績三考黜

陟今有官未半歲而黜者所黜徒信人言未必皆實此非唐虞三代之法亦非祖宗舊例也上深然之會吏部上大小庶官當黜者幾千人乃敕凡歷官未及三載者俱復其任雖一考未有貪暴實跡者亦勿黜蓋用公之言也醫官有療疾往來公家者以失職怨冢宰王公奏訐其短衆疑奏出公科道以爲言上察其誣待公益厚公性剛直與大臣議論所未安必反覆辨論言官論事必以是非詰之不肯媵阿取悅公無歲不求歸前後凡十三疏上皆不允問勞賜賚之使踵接於門文臣承恩眷未有如公者先娶金氏繼娶吳氏贈封一品夫人子男四長曰敦吳夫人出以蔭補國子生博學工文章先

公五年卒次崑次崙皆殤季曰京側室唐氏出女二適馮顥岑英孫男二長愷次甸平生著述甚多有瓊臺吟稿瓊臺類稿家禮儀節朱子學的世史正綱大學衍義補行於世又作莊子直解未成公博極羣書凡舉僻事問之則曰出某書某篇退取書閱之良是尤熟本朝掌故樂爲學者道之纒纒如目前事公今已矣世豈復有斯人哉嶺南人物自張文獻公有聲於唐余襄公崔清獻公有聲於宋迨公四人焉公晚登政府疾病半之故見於功業者僅若此然大學衍義補一書其經濟可見矣朱子學的一書其爲理學亦可知矣理學經濟兼而有之使得久其位盡行其言相業豈三君子可及哉銘

曰嶺南之陬靈氣充塞挺生偉人翊我皇極其人伊何  
曰惟文莊醇懿內實英華外彰乃官詞林乃登廷閣乃  
侍經筵乃典國學穹碑厚碣輝映四方緗篇青簡百世  
有光皇帝咨汝其代予言服休迓衡時惟汝賢公拜稽  
首臣老勿克寵命荐臨公乃就職公之在位調濡均平  
百吏奉法百度惟貞文爲國華位居保傅天之生公奪  
之何遽立言則多蓄未盡施方策所存百世之師石麟  
峩峩南海之隩文莊之墳過者必肅

案文莊公神道碑府縣志不載公家譜亦失傳光緒十  
四五年間朱亮生觀察重修公墓開墳前神道碑始出  
土修墓完仍舊安置不爲樹立墓庭又無人錄出原文  
歎惜久之及憲輯公年譜始從同宗慎齋孝廉老先生  
家得舊時鈔稿四百頁急爲補輯存之

明鄉貢進士王克信墓表

賜進士第國史館纂修翰林院修撰愚弟楊廷和撰文  
成化甲午予與瓊山縣王克信同在太學諸生中一相  
見輒以聲聞相友重明年會試禮部俱報罷因相與爲  
文會以勉其所未至居無□□□□□□□□□□予  
侍行遂與克信別□□□再至□□□抵掌議論古今  
相對終日乃別自君之南歸也予不及見曾幾何時而  
凶問至矣嗚呼君之所以自期如何何竟止於是君賦  
性明達與人交游肝膽相照是以予樂與之處而君亦

諒予之直予時年少無所見君不鄙爲之延譽公卿間予有過失君輒相規君有悔尤予舉以相告亦欣然納之而不忤也今大宗伯仲深邱公於君爲鄉先生時官翰林以道德文章重天下喜接天下士君每謂予曰子才質可造使得游邱公之門其學行必有可觀者予爲先容何如竊不自揣以窮鄉後學無所信而景仰者久之竟以事不踐所言君卒之明年予謬舉進士入翰林公已去爲國子祭酒□□□時以論學相啟發旣而公奉詔修國史得以從事其間回憶君所與進之言已償夙願而惜君不及見矣嗚呼予豈能忘情於君也哉初君下第後常居□□予欲□明年乃將□□□□□

家遂卒其時子少穉幼德配馮孺人教育以底於成又十有一年孺人亦卒其甥丘陶以貢來京師謂予曰外舅葬時不及表墓今□□□將葬欲得夫子一言以慰先靈於地下亦云幸矣予旣知君之深因甥之請不可不按狀而敘之君諱忱字克信別號頤菴其先本閩人在宋有諱達賜進士顯於時其孫諱進德爲乾寧按撫同知因家於瓊傳數世至南昌通判諱琪君之府君也生二子君爲季府君教之甚嚴使就讀太學天順壬午舉於鄉名在高等府君猶及見之未幾相捐館君與兄恢廬於墓側三年有白兔芝草之祥人以爲孝行所致云居卒於成化丙申年十二月三十日亥時距生於正

統戊午年七月二十日辰時享年三十有九馮孺人有賢行率時年四十有九君墓在烈樓羅嶺之原馮墓在五郎之原子二長朝泰次朝明俱補郡庠生女二一歸吳道南一歸邱陶夫君孝行可風便得天假之年其學術著世當不僅如此者孔子云有命在天豈真不可移耶爲善獲報不在其身而在子孫吾固知來者之有待也

案廷和字介夫新都人歷官至太子太師華蓋殿大學士邱陶字再成文莊公姪歲貢官訓導

### 大明唐母馮氏墓誌銘

馮氏名銀字汝白瓊山那邕都人教諭先生源女也在

襁拖中僅能言父教以詩書卽成誦稍長博通經史尤隱約深厚謹守禮法有古幽閑淑女之風嘗自序云昔先人任福建之龍岩而予始生再任江西之新城而予始受詩禮之訓此其在室時大畧也及長歸同邑東廂唐氏善繼唐氏世族名宦守乃祖侍御史頤庵先生遺訓清素澹泊惟以讀書業儒爲事馮氏至而喜曰是族風教可人吾歸得所矣動遵家法奉姑陳氏極其孝敬一味之甘姑未嘗不敢食自奉甚粗糲所以奉姑必精潔凡姑之心所願欲微見其意卽順承必至姑之心悅樂然後已待妯娌弟妹以禮有無通融未嘗較量所親或勸其爲私蓄計則默而不答持志愈堅而曰此所以



樂吾姑之心也始姑陳氏爲婦時事顛庵先生及祖妣太孺人楊氏也孝養備至太孺人嘗病危陳氏晝夜憂懣至廢寢食私自焚香禱天割股和羹以進木孺人怪其羹美食之盡既而病愈已乃知婦之所爲嘆曰古人所謂無以報新婦恩願新婦有子有孫皆如新婦孝順耳及得馮氏爲婦事姑如姑之事大孺人者人以爲陳氏孝姑之報云奉養之餘織紡針紉不釋手針紉之工尤極精緻時常口訓諸子以聖賢之學又自序云嘗與子觀書至顏子簞瓢陋巷舍書而作曰吾與顏氏之子同儔哉吾雖居於陋巷朝焉命僕以耕則有餘食矣夜焉督婢而織則有餘衣矣暇則與子觀書則有餘樂矣

又聞祖父嘗愛山谷不可斷讀書種子之言予實有契於衷不自知其陋也此其言幾於知道者豈女子所能其所作詩尤多如輓父聯云三春花木空青翠千載松楸自綠陰言空言青翠則知其實矣言自綠陰則知其無主矣以父無後故云然其言從容瀟散涵蓄不盡餘音此有詩人風雅惜乎不幸爲女子莫自彰顯於世也嗚呼昔衛莊姜許穆夫人錄於仲尼而列於國風今也豈有能輕重時人而取信後世者一爲斯人重之使其不泯也耶平生詩文未嘗出稿既歿之後善繼乃持以示余求志其墓余因得而采之所引其言皆出稿中語從實故也卒時成化某年某月某日去生時宣德某年

某月某日享年若干歲子男二曰怡娶周氏曰憬娶劉氏女二曰貴珍適訓導陳愨曰貴瑜適譚某以某年月日卜葬於祖塋之左雲亭山銘曰珊瑚玉樹生於深淵雖不見採而貴則然雲亭之山白石齒齒天地無窮永以寧此

鄉進士臨江府同知表弟王佐拜撰并書

成化十八年歲次壬寅秋月吉日立

安頤菴名舟官河南道御史祀鄉賢善繼名繼祖歲貢官長沙府經歷有傳怡郡文學憬歲貢佐誌墓時善繼未出仕子怡憬未進庠故未叙及